



# Uhapšeni krijumčari migranata

U saradnji policijskih agencija naše zemlje i Srbije uhapšeno je devet osoba

Cetiri osobe su uhapšene u akciji **Državne agencije za istrage i zaštitu (SIPA)** provedenoj jučer na području Zvornika, s ciljem otkrivanja i razbijanja organiziranih krijumčarskih lanaca migranata preko rijeke Drine. Na ovaj način krijumčari ostvaruju veliku nezakonitu imovinsku korist, istovremeno ugrožavajući sigurnosnu situaciju u BiH, prouzročenu prilivom ilegalnih migranata.

- Osumnjičeni su pod istragom i terete se da su djelovali kao članovi međunarodne grupe za krijumčarenje migranata, koja se sumnja da je u proteklom periodu prokrijumčarila više od 100 migranata iz Srbije u BiH, kazao je Boris Grubešić, glasnogovornik Tužilaštva BiH.

Akcija je provedena u saradnji s policijskim službenicima iz Republike Srbije, koji su istovremeno na području ove zemlje slobode lišili pet pripadnika navedene grupe za krijumčarenje migranata, među kojima je i osumnjičeni organizator.

- Znamo da postoji organizovana grupa, ali ih je jako teško uhvatiti na djelu, jer Drina je prevelika, a uglavnom rade noću. Hvatili smo ranije i organizatore iz Srbije, ali uglavnom se dosad radilo o stranim državljanima, koji su očito dio većeg lanca krijumčarenja ljudi, rekao nam je pripadnik Granične policije BiH iz regionalnog centra u Zvorniku, čije je ime poznato redakciji.

**MIREN ALJIĆ**



Uhapšeno je devet osoba osumnjičenih za krijumčarenje ljudi